

Communicaziun da medias digl cumegn da Surses (nr. 05-2020)

Surses: Igl cumegn meida igl sies lungatg da scola

Ancunter la proposta digl consegl da scola e la suprastanza communalà la radunanza communal da Surses decida d'introduceir puspe igl surmiran scu lungatg d'alfabetisaziun an scola. Uscheia bandunga er igl Surses la veia instradada avant onns cun igl rumantsch grischun. La midada è neida pretandeida d'ena iniziativa. Ultra da chegl è igl suveran er approvo igl rendachint annual tgi sera cun en resultat fitg positiv.

A parteir digl onn da scola 2021/22 ègl fitto cun igl rumantsch grischun ainten la scola populara da Surses. La radunanza communalà è accepto cun 213 cunter 141 vuschs l'iniziativa tgi è neida lantscheda la premaveira 2019 e pretenda da reintroduceir puspe igl rumantsch surmiran scu lungatg d'alfabetisaziun. Igl davos 13 onns è nia instrua an rumantsch grischun. Igl consegl da scola cun la gronda maioritad dallas persungas d'instrucziun e la suprastanza communalà èn stos cunter l'iniziativa ed on recumando da cuntinuar cun l'alfabetisaziun an rumantsch grischun, sa basond sen las experientschas positivas fatgas igls davos 13 onns. Er l'Uniun Rumantscha Grischun Central è sustignia la posiziun dallas instanzas uffizialas.

Igl argumaint principal digls iniziants per midar igl lungatg da scola è sto chel tg'igl consegl grond è revoco - sen proposta dalla regenza grischuna - la sia decisiun uriunda e decida da puspe edeir e finanztgier igls meds d'instrucziun aint igls divers idioms rumantschs. Chella decisiun vegia boicoto igl project visiunari per en lungatg da scritgira unifitgia per l'antiera Rumantscheia. Schi las otras valladas rumantschas survignan meds d'instrucziun an lour idiom, na dettigi tenor igls iniziants nigra raschung pigl Surses, da cuntinuar cun igl rumantsch grischun scu lungatg da scola.

Rendachint 2019

La radunanza communalà Surses è approvo unanimamaintg igl rendachint 2019, tgi è puspe ordvart plaschevel. Siva amortisaziuns extraordinarias da 1.5 milliuns francs ed ena prefinanziaziun da 2 milliuns francs per igl project dalla tgesa da scola primara a Savognin, sera igl rendachint cun en surple d'antradas da 1'330'359.00 francs. Chegl tar antradas da radond 30.5 milliuns e sorteidas da radond 27.8 milliuns. Chel resultat fitg positiv vign declaro cun antradas supplementaras da radond 2.1 milliuns francs tar igl sectour da finanzas.

Las investiziuns bruttas montan a radond 10.6 milliuns francs (investiziuns nettas 8.68 milliuns francs).

Ulteriours sclearimaints dat igl mastral Leo Thomann (telefonign 079 405 96 73)

Tinizong, igls 25 da fanadour 2020